



*Minggu, 30 Mei 2021*

**Ogen: Kuan-kuanen 15:18**



**Sabar Maba Dame**



*Kalak si perampang peturah perjengilen kap, tapi kalak sabar maba dame.* Teks enda sada persinget man banta kerna biak perampang ras perjengil. Kalak perampang rusur mpeturah perubaten. Sabab murah kal ia merawa, ersegat ate nandangi kalak si la bagi ukurna. Perampang e, belasina saja kai atena si ibelaskenna, la gedang pengukurina kerna perbahanenna. Akapna ia sijagona, lit tempa akapna kehebatenna, anggarkenna kebeluhenna, kitik tempa akapna jelma e kerina. Perbahanen kalak perampang e megati mpeturah perjengilen. Petembil ras biak saber, e maba perdamen. Kalak si saber mesera kal muat rawana, emaka labo pernah lit perubaten arah perbahanenna. Adi lit pe perbahanen kalak si la payo man bana, la ibalasnna alu perbahanen si jahat, cirem ia ras iukurina si mehulina. Kalak sabar, mereken diri ras pusuhna guna ngalemi kalak si ersalah man bana, lalap ia nggit ngalemi sabab e ngenca dalanna banci mpeturah perdamen. Kalak saber ngasup ngidah si mehulina amin lit perbahanen kalak si la mehuli man bana. Lalap ia ngukuri simehulina saja, positif carana rukur, sabar ia ngalaken kai gia si jadi. Kalak sabar geluhna teneng, damai si teridah i bas pusuhna nari. Guna ndatken kegeluhen si harmonis i bas keluarga ras masyarakat, biak saber enda perlu lalap ipebelin.

Hana, sekalak nande si saber, amin rusur isaling-saling kiduana Penina, la ia erbalas si mpeturah perubaten. Iukurina kai si perlu ilakokenna gelah la melas pusuhna ngalaken perbahanen kiduana. Pangen akapna lawes ku rumah pertoton, i je ia nungtungken pusuh si getem, iturikenna man Tuhan kai siinanamina. Adi ras Tuhan lit datkenna serpang puluh guna ndameken pusuhna. Ituduhkenna lalap perbahanen si mehuli man kiduana.

*Biak persabar aktif guna ndarami serpang puluh ibas kai pe*

